

Udin, ai 7 di Avrîl dal 2015

Radiofrute al è in onde

Une gnove transmission di Radio Onde Furlane sostignude e promovude de ARLeF

Di vinars ai 10 di Avrîl, l'etar regjonâl si insiore di un gnûf apontament radiofonic istituzionâl: **Radiofrute. Une transmission pai fruts e i lôr gjenitôrs**, un spazi di storiis in lenghe furlane gjavadis fûr dai libris che si cjatin tal marcjât editoriâl e tes bibliotechis dal FVJ, **sostignude e promovude de ARLeF**. Conducode di Michele Polo, si podarà scoltâ **ogni vinars e sabide (fin ai 20 di Jugn), aes 14.00**, su lis frecuencis di **Radio Onde Furlane (FM 90.0)**, ancje in direte streaming (www.ondefurlane.eu) e sul telefonut in gracie de gnove app de Radio.

«Nus interessave doprâ il mieç radiofonic par valorizâ la lenghe furlane fevelade dai fruts, tant che strument di cognossince dal mont – al marche il president de ARLeF, Lorenzo Fabbro -. Cun di plui, o volin promovi i vantaçs dal bilinguism dant ai grancj stimui e struments di riflessione, informazions e conseis pratics par cressi i fruts bilengâi».

La transmission si svilupe in trê parts principâls leadis une a chê altre e compagnadis des vôs dai fruts bi e plurilengâi. In cualchi pontade, ognidune e dure 20 minûts, a saran presentadis lis flabis in formât di audiolibri, par favorî la dimension sonore de lenghe e dal mieç radiofonic, in altris a saran letis storiis par fruts. Te seconde part al sarâ spazi pes intervistis e lis testimonieancis dai gjenitôrs che a àn fat une siele di bi o plurilinguism o che a àn rifletût e si son confrontâts su lis implicazions educativis di cheste siele intun teritori plurilengâl come chel dal FVJ. Te tierce part la peraule e passe ai esperts. Partint dal progjet promovût de ARLeF a sostegn dal plurilinguism precoç: "Crescere con piû lingue/Cressi cun plui lenghis" (www.arlef.it), si cognossaran miôr i diviers argomenti par mieç dai contribûts di Alessandra Burelli, Susanna Pertot, Patrizia Pavatti, Franco Fabbro, Silvana Schiavi Fachin, dai intervets e dai materiâi di esperts internazionâi, tant che Piero Angela o Antonella Sorace de Universitât di Edimburc.

Al è pussibil partecipâ ae transmission o ancje jessi intervistâts!

Baste mandâ une email a: radiofrute@ondefurlane.eu o un sms o WhatsApp al n. 370.1359469.

<<<<<<<<<<<<